
**ՀՈՎՍԵՓ ՕՐԲԵԼՈՒ ՆԵՐԴՐՈՒՄԸ
ՀԱՅԱԳԻՏՈՒԹՅԱՆ ԲՆԱԳԱՎԱՌՈՒՄ**

Հովսեփ Օրբելին (1887-1961) իր ողջ կյանքը նվիրել է հայրենի պատմության հետազոտությանը՝ հիմնվելով հնագիտական և վիճակագրական, միջնադարյան սկզբնաղբյուրների վրա: Ավելին, մեծ գիտնականը, ամբողջացնելով հետազոտական ոլորտները, իր ուսումնասիրությունների բնագավառն է ընդգրկել նաև արևելագիտական և կովկասագիտական հարցերը¹: Տարիների բեղմնավոր գիտահետազոտական աշխատանքի շնորհիվ Օրբելին իրեն փայլուն դրսևորել է որպես պատմաբան, բանասեր, աղբյուրագետ, վիճակագրագետ, հնագետ, լեզվաբան, բանագետ, ազգագրագետ, արվեստագետ՝ դասվելով XX դարի խոշորագույն հայագետների շարքը²:

Հ. Օրբելին գիտահետազոտական աշխատանքի ձիրք ցուցաբերեց դեռևս Ս. Պետերբուրգի Կայսերական համալսարանում: Պատմաբանասիրական ֆակուլտետում չբավարարվելով հունահռոմեական հնությունների դասընթացով՝ Օրբելին արտակարգ հետաքրքրասիրություն է ցուցաբերում Հայաստանի, Վիրքի և Իրանի հին և միջնադարյան պատմության ու մշակույթների նկատմամբ: Հայոց հնությունները ձգում էին երիտասարդ գիտնականին արյան կանչով: Օրբելու կյանքում շրջադարձային նշանակություն ունեցավ 1906

¹ Գիտատեղծագործական բեղմնավոր ճանապարհ անցած ակադեմիկոս Հ. Օրբելին գիտության մեծ նվիրյալ էր ու փայլուն կազմակերպիչ: Ս. Պետերբուրգի (1924-1991 թթ. վերանվանվել էր Լենինգրադ) համալսարանի պրիվատ-դոցենտ, այնուհետև՝ դոցենտ (1914-1918), պրոֆ. (1919-1933), 1919 թ. Ռուսաստանի Լուսժողովուրդի թանգարանների գործերով կոլեգիայի գիտական քարտուղար, հայ-վրացական բանասիրության (1925-1929), նյութական մշակույթի (1929-1931), Էրմիտաժի ավանդապահ (1920-1926), բաժնի վարիչ (1926-1933), տնօրեն (1934-1951), մինևույն ժամանակ ԽՍՀՄ ԳԱ նյութական մշակույթի պատմության ինստիտուտի տնօրեն (1937-1939): Հ. Օրբելին 1935 թ. ընտրվում է ԽՍՀՄ գիտությունների ակադեմիայի իսկական անդամ: Մեծ է Օրբելու ավանդը հայրենական գիտության և մշակույթի զարգացման գործում: 1938 թ. նա ընտրվում է ԽՍՀՄ ԳԱ հայկական մասնաճյուղի (ԱրմՖԱՆ) նախագահության նախագահ և անմնացորդ նվիրվում հայրենի գիտության կազմակերպման աշխատանքներին այնպիսի բարդ պայմաններում, երբ քաղաքական բռնաճնշումների հետևանքով շատ գիտնականներ հետապնդումների, ձերբակալությունների, աքսորի և գնդակահարությունների էին ենթարկվում: Հ. Օրբելին հնարավորինս ուշադրություն էր դարձնում գիտական կենտրոնների ամրապնդմանը և գիտական կադրերի պատրաստմանը: Նրա ակտիվ մասնակցությամբ 1943 թ. Հայաստանի Ժողովրդական տնտեսական համալսարանի հիմնադրումը ընդունեց ԱրմՖԱՆ-ի հիմքի վրա Հայկական ԽՍՀ գիտությունների ակադեմիան ստեղծելու մասին, որի առաջին նախագահ ընտրվեց ակադեմիկոս Հ. Օրբելին: Մինևույն ժամանակ նա ՀԽՍՀ ակադեմիայի պատմության ինստիտուտի տնօրենն էր: 1947 թ. մինչև 1951 թ. նա շարունակում է վարել Էրմիտաժի տնօրենի պաշտոնը: Այնուհետև աշխատում է Լեզվաբանության ինստիտուտի ավագ գիտաշխատող (1953-1955), 1955 թ.՝ արևելագիտության ֆակուլտետի դեկան, իսկ 1956- 1961 թթ.՝ նաև «Մերձավոր և Միջին Արևելքի պատմության» ամբիոնների պրոֆեսոր-վարիչ և Արևելագիտության ինստիտուտի Լենինգրադի բաժանմունքի վարիչ: Հ. Օրբելին իր գիտակազմակերպչական մեծ վաստակի համար արժանացել է պետական բարձր պարգևների:

² **Յուզբաշյան Կ. Ն.**, Հովսեփ Օրբելին որպես հայագետ (Պատմա-բանասիրական հանդես, այսուհետև՝ ՊԲՀ), 1987, N 1, էջ 11: **Տե՛ս նաև՝ Юзбашян К. Н. Академик Иосиф Абрамович Орбели, М., 1964, Պետրոսյան Յու.**, Ակադեմիկոս Հովսեփ Օրբելի (ծննդյան 100-ամյակի առթիվ), ՊԲՀ, 1987, N 1, էջ 3-10:

թվականից Բագրատունյաց թագավորության Անի մայրաքաղաքի պեղումներին մասնակցելը:

1911 թ. փայլուն կերպով ավարտելով արևելյան լեզուների և պատմա-բանասիրական ֆակուլտետների լրիվ դասընթացը՝ Օրբելին շարունակում է մասնակցել Անիի հնագիտական պեղումները կատարող խմբի աշխատանքներին: Միննույն ժամանակ Օրբելին նշանակվեց Անիի Հնադարանի տնօրեն³: Այդ ընթացքում հրատարակվեցին Անիի քաղաքատեղին և ճարտարապետական հուշարձաններին նվիրված հետազոտություններ⁴: Հ. Յրբելին շարադրում է քաղաքի պատմությունը, ապա տալիս է նկարագիրը և համառոտակի խոսում պեղումների մասին:

Հաջորդը՝ դեպի Արևմտյան Հայաստանի հինավուրց Վան քաղաքն ու Մոկս գավառը 1911-1912 թթ. կատարված գիտարշավներն էին: Նրա նպատակն էր Մեծ Հայքի Մոկք աշխարհում հայերենի տեղական բարբառի⁵ և Վասպուրական աշխարհում Վան քաղաքի ժայռի և հնավայրերի, սեպագրերի ու ազգագրական նյութերի ուսումնասիրությունը:

Հ. Օրբելու հետազոտական աշխատանքին բնորոշ էր պատմագիտության և բանասիրության տարբեր բնագավառներին պատկանող տրվյալների համակարգված ուսումնասիրությունը⁶: Այդ մեթոդաբանությունը դրսևորվեց նրա հետազոտական աշխատանքի հենց սկզբնական փուլից: Դրանով էր պայմանավորված Օրբելու ներդրումը հայոց պատմամշակութային արժեքների ուսումնասիրության բնագավառում:

Հ. Օրբելու հնագիտական, վիճագրագիտական, բանահյուսական հետազոտությունները հարստացրեցին հայագիտությունը արժեքավոր տվյալներով, որոնք հիմքեր էին ստեղծում հետագա գիտահետազոտական աշխատությունների համար:

Անիում, Վանում իրականացված հետազոտություններին հաջորդեցին Աղթամարում կատարված ուսումնասիրությունները, որոնք ամփոփվեցին

³ 1917 թ. թուրքերը ներխուժեցին Անիի տարածքը, և Հնադարանը ենթարկվեց ավերման: Նշվել է, որ «Անիի հնությունները սպառնալիքի տակ են, պահպանության որևէ աշխատանք չի տարվում, իսկ հայ գիտնականները կարող են դիտել Անին լավագույն դեպքում այս ամիս: Պարզ է, որ Հ. Օրբելու՝ բարձր մակարդակով կազմած տեղեկատու հրատարակությունները (ինչպես նաև Ն. Մառի մանրամասն հաշվետվությունները) կոչված են ինչ-որ չափով վերականգնելու Բագրատունյաց մայրաքաղաքի մոտավոր պատկերը» (Յուզբաշյան Վ., նշվ. աշխ., էջ 12):

⁴ Օրբելի Ի. Каталог Анийского музея древностей, СПб., 1910; Օրբելի Ի. Краткий путеводитель по городищу Ани (с планом), СПб., 1910; Օրբելի Ի. Развалины Ани. История. Современное состояние. Раскопки, СПб., 1911, (п»л Օրբելի Ի. А. Избранные труды, Е., 1963, с. 1-27, 103-132).

⁵ Օրբելի Ի. А. Фольклор и быт Мокса [Материалы подготовила к печати Р. Орбели], М., 1982. Из архива И. А. Орбели. Топографический и этнографический очерк Мокса (подготовил к печати, с примечаниями и некоторыми сокращениями А. Т. Ганалаян) (ՊԲՀ, 1977, N 2, p. 251-272). Վ. Յուզբաշյանը նշել է, որ Օրբելին աշխատել էր հենց Մոկսում, նա եղավ առհասարակ վերջինը, որովհետև 1915 թ. Մեծ եղեռնի հետևանքով Մոկսի ազգաբնակչությունը կամ ոչնչացվեց, կամ ընդմիջտ լքեց հայրենիքը» (Յուզբաշյան Վ., նշվ. աշխ., էջ 16):

⁶ 1909 թ. հրատարակվեցին Հովսեփ Օրբելու՝ Нефритовая кинжальная рукоять с армянской надписью; hАсан Джалал, князь Хаченский, 1912 г.; Колокол с анийскими орнаментальными мотивами XII-XIII века, 1915 г.; Бытовые рельефы на хаченских крестных камнях XII и XIII веков, 1916 г.; Два серебряных ковша XVI века с армянской и греческой надписями (տե՛ս Օրբելի Ի. А. Избранные труды, с. 135-195, 205-215 և այլ աշխատություններ):

հիմնականում նրա՝ «Հայկական ճարտարապետության հուշարձանները Աղթամար կղզում» աշխատության մեջ⁷։ Պատմական սկզբնաղբյուրների հիման վրա՝ հայկական ճարտարապետության պատմության հոլովոյթում մանրամասն հետազոտելով ճարտարապետական հուշարձաններով Աղթամար կղզու կառուցապատման իրողությունը, Հովսեփ Օրբելին առանձնակի ուշադրություն է դարձրել Աղթամարի Սուրբ Խաչ եկեղեցու ճարտարապետությանը⁸ և քանդակներին, որոնցից նա հատուկ ուսումնասիրել է թե՛ հինավուրց ազգային ակունքներ ունեցող «Սասունցի Դավիթ»՝ «Սասնա ծռեր» դյուցազնավեպին աղերսվող կերպարները և թե՛ «խաղողի գոտին», որպես ազգագրական պատկերներով մի նմուշ⁹։

Երկար տարիներ Օրբելին ուսումնասիրել է «Սասնա ծռեր» էպոսը։ 1939 թ. «Սասունցի Դավիթ» էպոսի 1000-ամյա հոբելյանի տոնակատարության առիթով նա մեծագույն կազմակերպչական ջանքեր գործադրեց, ինչպես նաև եղավ էպոսի համահավաք բնագրի հրատարակության պատասխանատու խմբագիրը և առաջաբանի հեղինակը։ Օրբելին նաև նույն թվականին լույս տեսած «Սասնա ծռեր»-ի ռուսերեն թարգմանության առաջաբանի հեղինակն էր¹⁰։ Տարիների պրպտումների արդյունքը եղավ 1956 թ. «Սասնա ծռեր» էպոսին նվիրված «Հայկական հերոսական էպոսը» գրքի հայերեն և ռուսերեն հրատարակությունը¹¹։

Հ. Օրբելու հետաքրքրությունների շրջանակում էին հայ միջնադարյան առակները, որոնք, ինչպես և էպոսում, արտացոլում էին ժողովրդի իմաստությունը։ Նույն՝ 1956 թ. լույս տեսավ Օրբելու «Միջնադարյան Հայաստանի առակները» գիրքը¹²։

Հ. Օրբելին մեծ հետաքրքրություն և մասնագիտական ունակություններ է ցուցաբերել վիմագիր արձանագրությունների ուսումնասիրության բնագավառում։ Վիմագիր արձանագրությունների Օրբելու հետազոտությունների շարքին են պատկանում Անիի, Բագավանի, Բագարանի, Նախիջևանի, Սանահնի կամրջի, Մարմաշենի վանքի, Խաչենում գտնվող հուշարձանների¹³, այդ թվում նաև Գանձասարի վանքի¹⁴, Թալինի եկեղեցու, Կարսի աշտարակների շինարարական վիմագիր արձանագրությունների ընթերցումը¹⁵։

Հ. Օրբելու բազմակողմանի ուսումնասիրությունների ոլորտում կարևորվում են նրա հայագիտական հետազոտությունները, հայ պատմիչ-

⁷ Օրբելի Ի. Ա. Избранные труды в двух томах, т. 1, М.-Л., 1968, с. 17-204.

⁸ Օրբելի Ի. Ա. О первоначальной форме купола Ахтамарского храма (п^ол Օրբելի Ի. Ա. Избранные труды, с. 222-228).

⁹ Օրբելի Ի. Ա. Избранные труды в двух томах, т. 1, с. 110, 135-168.

¹⁰ Давид Сасунский. Армянский народный эпос, М.-Л., 1939.

¹¹ Հովսեփ Օրբելի, Հայկական ժողովրդական էպոս, Ե., 1956, նույնը՝ ռուսերեն։

¹² Иосиф Орбели. Басни средневековой Армении, М.-Л., 1956; Օրբելի Ի. Ա. Басни средневековой Армении (Избранные труды в двух томах, т. 1, с. 209-385, 420-504, 521-534).

¹³ Ուլուբաբյան Բ. Ս., Խաչենի իշխանությունը X-XVI դարերում, Ե., 1975։

¹⁴ Օրբելի Ի. Бытовые рельефы на хаченских крестных камнях XII и XIII веков, п^ол Օրբելի Ի. Ա. Избранные труды, с. 196-204.

¹⁵ Տե՛ս Օրբելի Ի. Ա. Избранные труды, с. 371-476; Դիվան հայ վիմագրության, պրակ 1, Անի քաղաք, կազմեց Հ. Ս. Օրբելի, Ե., 1966։

ների (Եղիշէ¹⁶, Ղազար Փարպեցի, Թովմա Արծրունի) երկերի ուսումնասիրությունները և թարգմանությունները:

Հ. Օրբելու գիտական ժառանգությունը, հայրենանվեր գործունեության արդյունքները, ստեղծած պատմագիտական դպրոցը, բազում աշակերտները նրա մեծ վաստակի վկայությունն են, որի շնորհիվ նրա հանդեպ եղած սերն ու ակնածանքը իր սրտում է կրում պատմագիտության ասպարեզ մտնող նոր սերունդը:

Ս. Պետերբուրգում կանգնեցված է Հ. Օրբելու կիսանդրին: Ծաղկաձորում բացված է Օրբելի եղբայրների տուն-թանգարանը:

ԴԱՆԻԵԼՅԱՆ Է. Լ.

Պատմական գիտությունների դոկտոր

¹⁶ **Եղիշէ.** *О Вардане и войне армянской. Перевод с древнеармянского акад. И. А. Орбели. Подготовка к изданию, предисловие и примечания К. Н. Юзбашяна, Е., 1971.*